

Nalakkersuisut suleriaasiat pillugu nalunaarummut ilanngussaq

Nalakkersuisut ataatsimiittarneri

1. Naalakkersuisut Siulittaasuata Naalakkersuisoqarfia Naalakkersuisunut allattaaneq isumagisarpaa.
2. Nalunaarummi uani ilanngussamiluunniit piumasaqaataasut naammassineqarsimatinnagit suliassaq Naalakkersuisunut suliakkiutigineqartoq Naalakkersuisut Siulittaasuata Naalakkersuisoqarfiata itigartitsissutigisinnavaa.

Naalakkersuisut isummernissaanut tunngavissiat Naalakkersuisunullu ilisimatitsissutit Naalakkersuisunit suliaqartussat pillugit periusissaq saqqummiussassallu ilusissaanut piumasaqaatit

1. Isummernissamut tunngavissiat Naalakkersuisunit oqallisigineqartussat Naalakkersuisut Siulittaasuata Naalakkersuisoqarfiani allattoqarfimmit Naalakkersuisut ataatsimiinnissaat sapaatip akunneranik ataatsimik sioqqullugu kingusinnerpaamik sisamangornermi nal. 12.00 tunniunneqareersimassapput. Naalakkersuisut Siulittaasuata imaluunniit Naalakkersuisut Siulittaasuata Naalakkersuisoqarfiani Pisortaanerup suliassat nukinginnartutut nalilerneqartillugu immikkut akuersissuteqarnikkut allamik piffissaliisinnapput.
2. Inatsisartut ataatsimiinnerisa nalaanni suliassat Inatsisartuni suliarineqartussat Naalakkersuisullu ataatsimiinnerani suliassangortinneqartut Naalakkersuisut Siulittaasuata Naalakkersuisoqarfiani allatseqarfimmut ulloq ataatsimiiffissaq ullormi ataatsimik sioqqutsilluni nal. 12.00 tunniunneqareersimassapput.
3. Isummernissamut tunngavissiat ullulernerqarsimallutillu qupperneri normoqartitaassapput Wordimillu 12-inik annertussusilimmik Times New Romanimillu naqinnilerneqartarsimassallutik. Pappiaqqat sinai tamarmik 2,5 cm-iussapput, isummernissamullu tunngavissiat quppernertit 3-nit amerlanerussanatik.
4. Isummernissamut tunngavissiat kalaallisut qallunaatullu saqqummiunneqartassapput.
5. Isummernissamut tunngavissiat ilanngussanik (bilag) ilaqartinneqarsinnaapput. Ilangussat aatsaat ilanngunneqarsinnaapput, taakkununga isummernissamut tunngavissiami innersuussisoqarsimappat. Ilangussat aamma kalaallisut qallunaatullu saqqummiunneqartassapput.
6. Ilangussat erseqqissumik ilisarnaaserneqartassapput ilanngussap quppernerani siullermi qulaani normulerlugit. Ilangussat isummernissamut tunngavissiap quppernerisa kingorna tullerriaarlugit normulersorneqartassapput. Ilangussat qarasaasiakkut nassiunneqartassapput.
7. Ilangussaq isertuussassatut suliarineqassappat, tamanna ilanngussani allassimassaaq.
8. Isummernissamut tunngavissiasatut missingiutit nalinginnaasumik minnerpaamik sapaatip akunneranik ataatsimik akinissamut piffissaqartitsilluni naalakkersuisoqarfimmut tusarniutigineqartassapput. Tusarniutigineqartoq Aningaasaqarnermut Naalakkersuisoqarfimmit piffissaliussap iluani akissuteqarfigineqarsinnaatinnagu tusarniaanermi akissuteqaatissap saqqummiunneqarsinnaalernissaata tungaanut suliap suliarineqarnissaa kinguartinneqassaaq. Aningaasaqarnermut Naalakkersuisoqarfiup

tusarniaanermi killissarititap eqquutsinnginneranut peqquataasoq piaartumik kiisalu tusarniaanermi akissutissap qaqugu takkunnissaa nassuiaateqarfigissavaa.

9. Naalakkersuisunut ilisimatitsissutit Naalakkersuisut Siulittaasuata Naalakkersuisoqarfiani allatseqarfimmut imm. 1-imi siuliani periutsit assigalugit tunniunneqartassapput.

10. Pisuni immikkut ittuni Naalakkersuisut isummernissaannut tunngavissianut aamma ilisimatitsissutinut suleriaatsit aamma ilusissanut piumasaaqatit matuma siuliani taaneqartut Naalakkersuisut Siulittaasuata akuersissuteqarneratigut, saneqqunneqarsinnaapput, takuuk Naalakkersuisut suleriaasiat pillugu nalunaarummi § 14.

Naalakkersuisut aalajangiiffigisaannik tamanut saqqummiussaqaqtarneq

1. Naalakkersuisut Siulittaasuata Naalakkersuisoqarfiata isumagisarissavaa, Naalakkersuisut ataatsimiinnerini aalajangiunneqartut tamanut ammasumik nittartakkami tamanut saqqummiunneqartarnissaat.

2. Isummernissamut tunngavissiat isertuussassaattillugit tamanut saqqummiunneqartassanngillat.